

«A Sent be rumantsch» per la quarta jada

40 personas as partecipeschan a l'eivna intensiva da rumantsch a Sent

Fingià per la quarta jada ha lö l'eivna «A Sent be rumantsch». Il cuors ha cumanzà cun l'impromischiun dals scolars, dals partecipants e da las famiglias chi dan alloggi da discuorrer tuot eivna be rumantsch.

«Quist on vain nus 40 personas chi piglian part a noss'eivna da rumantsch», disch Cristina Gregori, la coordinatura dal cuors. Tenor ella es quist'eivna per tuot ils partecipats üna gronda sfida. «Il möd d'imprender immersivamaing üna lingua es per tuots fich intensiv. Ils partecipants pon imprender rumantsch in ün ambiaint protet. Cun abitar pro üna famiglia vegnan els eir confruntats sper las uras da scuola culla lingua», decler'la. L'anr ha vulgü savair dals partecipants che chi tils anime-

scha d'imprender üna lingua estra in quist möd particular.

«Eu nun inclegiaiv gnanca pled»

Vreni Meister da Brugg i'l chantun Argovia: Eu am partecipesch fingià per la quarta vouta a quist'eivna a Sent. Nossa famiglia passainta adüna las vacanzas da skis a Scuol e quai es stat per mai ün dals motifs per imprender a discuorrer rumantsch. La prüma vouta ch'eu m'ha partecipada «A Sent be rumantsch» nun inclegiaiv'eu gnanca pled. Grazça a la famiglia chi m'ha dat quella vouta alloggi n'haja pudü imprender fich bler da quista lingua. Eu n'ha lura eir amo fat ün cuors da rumantsch ad Aarau. Cun quai d'eira lura per mai pro la segunda partecipaziun a quist cuors a Sent fingià tuot ün pa plü simpel. Eu m'ha partecipada desch voutas als cuors intensivs da la Lia Rumantscha a Scuol e trais voutas suna eir fingià statta als cuors da rumantsch a Sta. Maria in Val Müstair. Intant incleg'eu fich bain

la lingua e n'ha eir imprais a tilla scriver.

Andreas Wetter da Schleinikon, in vicinanza da Turich: Eir eu sun fingià per la quarta vouta da la partida a quist cuors. Insembl cun mia duonna n'ha eu ün'abitaziun da vacanzas a Sent e nus eschan bler qua, saja quai d'ürant la stà o l'inviern. Per mai esa important da pudair comunicar culla glied in lura lingua ed al listess mumaint n'haja la pussibilità d'imprender alch da la cultura da la regiun. Plünavant vain nus eir bliers cuntschaints a Sent ed in Engiadina Bassa ed eu less pudair discuorrer cun els rumantsch. Qua a Sent pudaina discuorrer tuottadi rumantsch. L'ambiaint e la cultura es tuot oter co pro'ls ulteriurs cuors da rumantsch. D'ürant l'eivna abit eu pro duos frars e quels pisseran fich bain per mai.

«Mai discurrü cun mai rumantsch»

Gabriela Gadiant da Dällikon pro Turich: Eu sun per la terza jada qua a Sent


e passaint uschea ün'eivna da rumantsch. Mia mamma es oriunda da Zernez. Displaschavelmaing nun ha ella mai discurrü cun mai rumantsch. Uschea n'haja decis d'imprender quista lingua, quai d'eira eir adüna ün da meis giavüschs. Nus possedain a Zernez üna pitschna abitaziun da vacanzas. Là n'haja eir la pussibilità da discuorrer rumantsch culla glied indigena, saja quai cun far cumpritas, pro'l bacher o eir in ustaria. A mai persunalmaing plascha quista lingua fich bain. Be chi nun es uschè simpel da tilla imprender.

Ursula Räber da Winterthur: Eu n'ha ün'abitaziun da vacanzas qua a Sent. E per mai esa important da pudair discuorrer la lingua dal lö. Uschè pigl'eu uossa fingià per la terza vouta part a l'eivna «A Sent be rumantsch». Per mai es quai eir la lingua da l'Engiadina ed üna bella lingua. E lapro ha'la ün cling chi'm plascha bain. Qua al lavuratori imprendain nus sots engiadinais. Per mai nun esa be important da cugnuo-

scher la lingua, eir la cultura dal lö e da la regiun toccan pro. Uschè sun ils sots per mai üna part da cultura sco cha quai es eir pro la lingua e la musica.

«Las linguas sun sco musica»

Lina Schäfli da Steckborn i'l chantun da Turgovia: Per mai es quist la prüma partecipaziun a l'eivna da «A Sent be rumantsch». Però i nun es il prüm cuors da rumantsch ch'eu fetsch. Eu n'ha visità trais voutas ils cuors intensivs da rumantsch a Scuol. A mai plascha l'idea da star pro üna famiglia e da pudair discuorrer uschea eir davo ils cuors da rumantsch quista lingua. Plünavant s'haja eir la pussibilità d'imprender a cugnuoscher otra glied. Per mai sun las linguas sco musica. A mai plascha eir tuot la cultura da la regiun, ils cumüns cullas chasas engiadinais e naturalmaing eir la bella natüra in Engiadina. Per mai esa sco ün dovair d'imprender eir la quarta lingua naziunala da nos pajais. (anr/afi)



Ils partecipants da l'eivna «A Sent be rumantsch» imprendan intensivamaing la lingua rumantscha ed eir üna part da la cultura indigena. Da schnestra: Vreni Meister, Andreas Wetter, Gabriela Gadiant, Ursula Räber e Lina Schäfli.

fotografias: Annatina Filli